



XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA
Secretaría Xeral de Política Lingüística

Rúa San Roque, 2
15781 Santiago de Compostela
Tfno.: 881 996 302
Fax: 881 996 306
www.xunta.es/linguagalega

galicia

CONVOCATORIA DO CONCURSO PARA ELABORAR A EXPOSICIÓN SOBRE O AUTOR HOMENAXEADO O DÍA DAS LETRAS GALEGAS 2017

A Secretaría Xeral de Política Lingüística convoca un concurso, con motivo do Día das Letras Galegas, para elaborar unha exposición sobre a obra, época e lingua do autor homenaxeado en 2017, Carlos Casares Mouriño, e/ou sobre a situación sociolingüística da etapa histórica en que este viviu.

OBXECTIVOS

- 1 Potenciar o estudo da obra e da época de Carlos Casares Mouriño.
- 2 Propiciar a reflexión sociolingüística sobre esta etapa histórica.
- 3 Fomentar a valoración das contribucións individuais e colectivas á dignificación e normalización da lingua galega.
- 4 Impulsar a realización de actividades que fomenten a colaboración entre os departamentos e potencien a implicación activa do profesorado e do alumnado.
- 5 Promover e difundir a figura do autor homenaxeado entre a comunidade educativa.
- 6 Enriquecer a oferta de materiais didácticos existentes en lingua galega e promover a súa divulgación como referentes para outros centros.

BASES

1 Obxecto da convocatoria

O traballo consistirá na elaboración dunha exposición sobre o autor homenaxeado o Día das Letras Galegas 2017, Carlos Casares Mouriño.

2 Participantes

Poderán participar todos os centros docentes de ensino público non universitario dependentes da Consellería de Cultura, Educación e Ordenación Universitaria aos que se refire a base segunda desta convocatoria.



Formarase un equipo de docentes integrado por un número máximo de 10 persoas (agás excepcións debidamente xustificadas). Unha delas realizará as funcións de coordinación.

3 Categorías

Establécense dúas categorías de participación, en función do tipo de centro:

Categoría A: centros de educación infantil e primaria

Categoría B: centros de educación secundaria e bacharelato, de formación profesional e restantes centros de ensinanzas especiais: ensinanzas artísticas (de arte dramática, de artes plásticas e deseño, de conservación e restauración, de danza, de deseño, de música), ensinanzas deportivas e ensinanzas de idiomas

Os centros educativos nos que se imparta educación infantil, primaria e secundaria poderán concursar nas dúas categorías.

4 Premios

Concederase un premio para cada categoría de participación.

O centro que elabore a exposición gañadora de cada categoría recibirá un premio en metálico por un importe de 2 000 €.

Se a calidade dos traballos presentados non for a axeitada, os premios poderán quedar desertos.

5 Certificacións

O profesorado implicado activamente na elaboración das exposicións gañadoras recibirá unha certificación de premio de innovación educativa, cunha equivalencia de 20 horas de formación permanente do profesorado.

O coordinador ou coordinadora recibirá unha certificación de premio de innovación educativa equivalente a 30 horas de formación permanente do profesorado.

6 Eixe temático dos traballos

O eixe temático da exposición será a obra e a época de Carlos Casares Mouriño, observadas desde unha perspectiva interdisciplinaria; o percorrido biográfico será só un pretexto para abordar unha realidade complexa e heteroxénea.

7 Forma de elaboración do traballo

O traballo será cooperativo e implicará a colaboración activa do alumnado e profesorado de diferentes departamentos, niveis, ámbitos, materias, áreas e/ou módulos.



8 Número e características dos carteis e da guía

A exposición constará de:

- 10 carteis de 70 x 50 cm.

- Unha guía ou cuestionario de extensión non superior a 20 páxinas; conterá unha serie de actividades para cada cartel, que terán o obxectivo de guiar a observación da exposición e fomentar o labor de investigación do alumnado.

A técnica que se utilizará será libre e os traballos poderanse presentar en cor.

Os traballos serán orixinais e inéditos.

Descartaranse os traballos que non atendan a estas características.

9 Presentación dos traballos

Os traballos entregaranse en formato dixital pdf (modo de cor CMYK, resolución máxima) e JPG (cunha resolución entre 100 e 200 píxeles/polgada), acompañados da reprodución impresa dun dos carteis. A guía entregárase en formato pdf.

Introduciranse nun sobre cerrado que levará no exterior un lema ou pseudónimo como única identificación. Dentro del incluírase outro sobre, tamén cerrado, que levará no exterior o mesmo lema ou pseudónimo e no interior o nome e os datos do centro e mais unha certificación da súa dirección coa relación do profesorado que participou de forma activa (segundo o ANEXO I).

Presentaranse preferentemente no Rexistro Auxiliar da Secretaría Xeral de Política Lingüística, no Rexistro Central da Xunta de Galicia ou nos das súas delegacións territoriais. Tamén poderán presentarse polos medios que establezan as disposicións legais vixentes.

Para axilizar a recepción dos traballos, os centros poderanlle adiantar a proposta de carteis e de guía á Secretaría Xeral de Política Lingüística mediante un envío ao seguinte enderezo electrónico: sxpl.planificacion@xunta.es; os traballos estarán identificados só co lema ou pseudónimo e o envío realizarase desde un enderezo electrónico distinto ao do centro para garantir o anonimado. Esta forma de envío non exime os centros de entregaren os traballos polos medios indicados no parágrafo anterior.

10 Prazo

O prazo de presentación dos traballos remata o día 22 de xaneiro de 2017 (incluído).



11 Xurado

Para o ditame dos premios establecerase un xurado constituído polos seguintes membros:

- A persoa titular da Subdirección Xeral de Planificación e Dinamización Lingüística ou a persoa en quen delegue.
- As persoas coordinadoras de ámbito territorial dos equipos de dinamización da lingua galega.
- Un asesor ou asesora técnica da Secretaría Xeral de Política Lingüística que se encargará dos contidos educativos.

O xurado poderá contar cos informes dunha comisión técnica especializada para colaborar na valoración dos proxectos cando o considere pertinente.

12 Criterios de valoración

O xurado terá en conta os seguintes criterios de valoración:

- Ampliación da perspectiva de coñecemento do autor homenaxeado.
- Inclusión de actividades dirixidas a distintos ámbitos de coñecemento, ademais das correspondentes aos departamentos implicados.
- Nivel de implicación e incidencia na comunidade educativa.
- Carácter motivador e orixinalidade da proposta.
- Orde, claridade, coherencia e corrección gramatical na presentación.
- Calidade técnica do produto.

13 Tratamento dos orixinais

Os orixinais non premiados serán devoltos, sempre que os centros o soliciten por escrito, no prazo máximo dun mes a partir da data en que se publique a resolución do xurado. Os orixinais que non se retiren destruíranse.

14 Distribución das exposicións gañadoras

A exposición de cada unha das categorías que resulte seleccionada será impresa e distribuída en máis de 1 600 puntos de Galicia e do exterior, tales como centros de ensino, centros de estudos galegos, centros da emigración, bibliotecas municipais e casas da cultura, entre outros. Nela figurarán a imaxe gráfica da Xunta de Galicia e o nome do centro gañador.

15 Responsabilidades legais



A Secretaría Xeral de Política Lingüística quedará eximida de toda responsabilidade derivada do plaxio ou de calquera transgresión da lexislación vixente na que puideren incorrer os/as participantes en materia de propiedade intelectual.

16 Difusión dos traballos gañadores

A Secretaría Xeral de Política Lingüística reserva para si o dereito a organizar exposicións e/ou exhibir, reproducir ou publicar a imaxe ou o contido dos traballos presentados, por calquera medio que se considere oportuno, sen máis limitacións que as derivadas do Real decreto lexislativo 1/1996, do 12 de abril, polo que se aproba o texto refundido da Lei de propiedade intelectual.

17 Propiedade intelectual

O concepto creativo global do traballo é de explotación exclusiva da Secretaría Xeral de Política Lingüística. Todos os materiais que se produzan pasarán a ser propiedade da Secretaría Xeral de Política Lingüística que, de acordo cos autores, poderá realizar as modificacións que melloren o resultado final e faciliten acadar os obxectivos desta convocatoria.

18 Modificacións

Os centros gañadores deberán entregarlle á Secretaría Xeral de Política Lingüística os traballos presentados nun formato de alta resolución que permita realizar as modificacións que, de acordo cos autores, cumpra realizar.

19 Aceptación das bases

A participación no concurso implica a aceptación destas bases. A Secretaría Xeral de Política Lingüística queda facultada para dirimir calquera controversia derivada da súa interpretación.

O ditame do xurado será inapelable.

Santiago de Compostela, 20 de outubro de 2016



Valentín García Gómez

Secretario Xeral de Política Lingüística